

Spiritum sanctum ; nec se illis ostendit post resurrectionem, sed solis fidelibus Discipulis suis, ne quasi insultare se occidentibus voluisse videretur. Plus enim erat, amicos docere humilitatem, quam inimicis exprobrare veritatem. Resurrexit : plus fecit quam illi exigebant, non credendo, sed insultando et dicendo : « Si Filius Dei est, descendat de cruce<sup>1.</sup> » Et qui de ligno descendere noluit, de sepulcro surrexit. Ascendit in cœlum, misit inde Spiritum sanctum : implevit Discipulos, correxit timentes, fecit fidentes. Petri trepidatio in fortitudinem prædictoris repente conversa est. Unde hoc homini ? Quære Petrum præsumentem, invenis Petrum negantem : quære Deum adjuvantem, Petrum invenis prædicantem. Ad horam trepidavit infirmitas, ut præsumptio vinceretur, non ut pietas deleretur. Implet ille Spiritu suo, et facit prædicatorem fortissimum, cui præsumenti prædixerat : « Ter me negabis<sup>2.</sup> » Præsumperat enim ille de viribus suis, non de Dei dono, sed de libero arbitrio. Dixerat enim : « Te cum ero usque ad mortem. » Dixerat in abundantia sua : « Non movebor in æternum<sup>3.</sup> » Sed qui in voluntate sua præstiterat decori ejus virtutem, avertit faciem suam, et factus est conturbatus. « Avertit, inquit, Dominus, faciem suam : » ostendit Petro Petrum ; sed postea respexit, et Petrum firmavit in petra. Imitemur ergo, fratres mei, quantum possumus, in Domino passionis exemplum. Implere poterimus, si ab illo poscamus adjumentum, non præveniendo, sicut Petrus præsumens; sed sequendo et orando, sicut Petrus proficiens. Quando enim Petrus ter negavit, quid Evangelista dicit, attendite : « Et respexit eum Dominus, et recordatus est Petrus<sup>4.</sup> » Quid est, respexit eum ? Non enim Dominus in facie corporali

<sup>1</sup> Math. xxvii, 40. — <sup>2</sup> Id. xxvi, 34. — <sup>3</sup> Psal. xxix, 7, etc. — <sup>4</sup> Luc. xxii, 61.

eum tanquam commemorando respexit. Non sic est : Evangelium legite. Dominus in interioribus domus judicabatur, Petrus in atrio tentabatur. Ergo « Respexit eum » Dominus, » non corpore, sed majestate; non oculorum carnis intuitu, sed misericordia altissima. Ille quia averterat faciem suam, respexit eum, et factus est liberatus. Ergo præsumptor periisset, nisi Redemptor respexisset. Et ecce lacrymis suis ablutus, correptus et ereptus prædicat Petrus. Prædicat qui negaverat : credunt qui erraverant. Valet in phreneticis medicina illa sanguinis Domini. Bibunt credentes quod fuderunt sævientes. Sed multum est ad me, inquit, imitari Dominum. Ex gratia Domini imitare conservum, imitare Stephanum, imitare Mariannum et Jacobum. Homines erant; conservi erant; sicut tu nati, sed ab illo qui non sic natus est, coronati.

### SERMO CCLXXXV<sup>1.</sup>

*In die Natali Martyrum Casti et Æmili<sup>2.</sup>*

I. SANCTORUM Martyrum non magna solum, sed etiam pia virtus, ( Ipsa est enim utilis virtus, imo ipsa est vera et sola dicenda virtus, quæ non militat typho, sed Deo.) admonet nos Charitati Vestræ loqui, eamque admonere, ita solemnia Martyrum celebrare, ut vestigia Martyrum sequendo delectet imitari. Non enim et ipsi quod fortis

<sup>1</sup> Alias 4 inter editos ex majoris Carthusiae MSS. — <sup>2</sup> Martyrum vero istorum natalitia in Martyrologiis et in Carthaginensi Kalendario consignata sunt XI Kalendas Junii.

exterunt, de suo habuerunt. Non usque ad illos fons ille manavit. Qui dedit ipsis potens est dare et nobis : quoniam unum pretium datum est pro omnibus nobis.

II. Illud ergo præcipue commonendi estis, quod assidue commoneri, et semper cogitare debetis, quod Martyrem Dei non facit poena, sed causa. Justitia enim nostra, non cruciatibus, delectatur Deus : nec queritur in omnipotenti veracisque judicio, quid quisque patiatur, sed quare patiatur. Ut enim cruce Dominica nos signemus, non fecit hoc Domini poena, sed causa. Nam si poena hoc fecisset, hoc et latronum similis poena valuisse. Unus locus erat trium crucifixorum, in medio Dominus, qui « Inter iniquos deputatus est<sup>1</sup>. » Duos latrones hinc atque inde posuerunt : sed causam similem non habuerunt. Lateribus pendentis adjungebantur, sed longe separabantur. Illos facinora sua, illum crucifixerunt nostra. Verumtamen etiam in uno ipsorum satis apparuit, quantum valeret, non cruciatus pendentis, sed pietas confitentis. Acquisivit latro in dolore, quod Petrus perdiderat in timore : scelus admisit, crucem ascendit : causam mutavit, paradisum comparavit. Meruit omnino causam mutare, qui non contempserit in Christo similitudinem poenae. Judæi contempserunt miracula facientem, ille credidit in pendentem. Consortem crucis Dominum agnovit, et regno cœlorum credendo vim fecit. Tunc in Christum latro credidit, quando fides apostolica trepidavit. Merito audire meruit : « Hodie mecum eris in paradyso<sup>2</sup>. » Hoc quidem sibi ipse non promiserat : magnæ quidem se misericordiae commendabat, sed et sua merita cogitabat. « Domine, inquit, memento mei, dum veneris in regnum tuum. » Quousque veniret Dominus in regnum suum, in poenis se futurum sperabat, et saltem in ejus adventu miserordiam

<sup>1</sup> Isaï. lxxii, 22. — <sup>2</sup> Luc. xxiii, 43.

in se fieri flagitabat. Proinde se latro, sua merita cogitans, differebat : sed Dominus latroni, quod desperaverat, offerebat; tanquam diceret : Tu petis ut meminerim tui, dum venero in regnum meum, « Amen, amen dico tibi : » Hodie tecum eris in paradyso. » Agnosce cui te commendas; quem credis venturum, antequam veniam, ubique sum. Ideo quamvis in inferna descensurus, habeo te hodie in paradyso; non alteri commendatum, sed tecum. Ad homines enim mortales et ad ipsos mortuos descendit humilitas mea, de paradyso autem nunquam discedit divinitas mea. Ita factæ sunt tres crucis, tres causæ. Unus latronum Christo insultabat, alter sua mala confessus Christi se misericordiae commendabat. Crux Christi in medio non fuit supplicium, sed tribunal : de cruce quippe insultantem damnavit, credentem liberavit. Timete, insultantes; gaudete, credentes : hoc faciet in claritate, quod fecit in humilitate.

III. Munera divina de profundo Dei judicio veniunt : mirari ea possumus, investigare non possumus : « Quis enim cognovit sensum Domini? Et quam inscrutabilia sunt iudicia ejus, et investigabiles viæ ejus<sup>1</sup>! » Sequens per omnia vestigia Christi Petrus conturbatur, et negat : respicitur, et plorat, fletus tergit, quod timor inficerat. Non fuit illa Petri desertio, sed eruditio. Amare quippe Dominum interrogatus in corde suo præsumperat se pro eo etiam moritum. Viribus suis hoc tribuerat : nisi pauper a regente deseretur, non sibi demonstraretur. Ausus est dicere : « Animam meam pro te ponam. » Animam suam pro Christo præsumptor se positum esse jactabat, pro quo nondum posuerat Liberator. Denique cum timore turbatur, sicut Dominus prædixerat, ter negat eum, pro quo se promiserat moritum. Sicut scriptum

<sup>1</sup> Rom. xi, 33, 34.

est : « Respxit illum Dominus. » At ille, « Amare flevit<sup>1</sup>. » Amara erat recordatio negationis, ut dulcis esset gratia redēptionis. Niſī desertus, non negaret; niſī respextus, non fleret. Odit Deus præsumptores de viribus suis, et tu morem istum in eis, quos diligit, tanquam medicus secat. Secundo quidem infert dolorem : sed firmat postea sanitatem. Itaque resurgens Dominus commendat Petro oves suas illi negatori; sed negatori, quia præsumptori; postea pastori, quia amatori. Nam quare ter interrogat amantem, niſi ut compungat ter negantem? Proinde perfecit postea Petrus gratia Dei, quod primo non potuit fiducia sui. Nam posteaquam illi oves, non Petri, sed suas commendavit, ut non pasceret sibi, sed Domino, annuntiavit ei passionem futuram, quam primo perdidērat; quoniam præpropere festinabat. « Cum senior, in- » quit, factus fueris, alter te cinget, et feret quo tu non » vis. Hoc autem dixit, significans qua morte glorifica- » turus erat Dominum<sup>2</sup>. » Factum est, pervenit Petrus ad passionem, qui lacrymis diluerat negationem. Quod ei promiserat Salvator, non potuit auferre tentator.

IV. Tale aliquid factum esse arbitror etiam in his martyribus sanctis Casto et Æmilio, quorum diem hodie celebрамus. Fortasse et ipsi de suis viribus antea præsumperunt, et ideo defecerunt. Ostendit eis qui essent ipsi, qui ipse. Repressit præsumentes, et vocavit credentes; adjuvit pugnantes, coronavit vincentes. Denique jam de illis gaudebat inimicus in prima congreſſione, quando cesserunt doloribus, in suis eos partibus computabat; jam exultabat, jam suos habebat; sed quantum eis concessum est, Domino miserante; alli Martires diabolum vicerunt tentantem; isti etiam triumphantem. Itaque, fratres mei, meminerimus quorum celebritatem hodie celebramus; nec

<sup>1</sup> Luc. xxii, 61. — <sup>2</sup> Joan. xxi, 18, 19.

velimus imitari quod victi sunt, sed potius quod vicerunt. Ideo magnorum casus non latuerunt, ut timeant qui de se præsumperunt. Ubique nobis humilitas magistri boni diligentissime commendatur. Quandoquidem et salus nostra in Christo, humilitas Christi est. Nulla enim nostra salus esset, niſi Christus humilis pro nobis fieri dignatus esset. Meminerimus de nobis ipsis non esse præfidendum. Deo commendemus quod habemus; ab illo imploremus quod minus habemus.

V. Martyrum perfecta justitia est, quoniam in ipsa passione perfecti sunt. Ideo pro illis in Ecclesia non oratur. Pro aliis fidelibus defunctis oratur, pro Martyribus non oratur; tam enim perfecti exierunt, ut non sint suscepti nostri, sed advocati<sup>1</sup>. Neque hoc in se, sed in illo cui capiti perfecta membra cohæserunt. Ille est enim vere advocatus unus, qui interpellat pro nobis, sedens ad dexteram Patris<sup>2</sup>; sed advocatus unus, sicut et pastor unus. Nam « Oportet, inquit, me et eas oves adducere, » quæ non sunt de hoc ovili<sup>3</sup>. » Ut Christus pastor, Petrus non pastor? Imo et Petrus pastor, et cæteri tales sine ulla dubitatione pastores. Nam si non pastor, quomodo ei dicitur : « Pasce oves meas<sup>4</sup>? Sed tamen verus pastor, qui pascit oves suas. Petro enim dictum est, non, Pasce oves tuas, sed « meas. » Petrus ergo non in se, sed in corpore pastoris est pastor. Nam si oves suas pasceret, continuo fierent hœdi, quos pasceret.

VI. Contra hoc enim quod Petro dicitur : « Pasce oves meas; » dicitur in Canticis canticorum : « Nisi cognovis temetipsam, o pulchra inter mulieres<sup>5</sup>. » Cui dicitur, utique agnoscamus, et in illa nos etiam audimus. Ecclesia quippe hoc audit a Christo, sponsa audit a sponso:

<sup>1</sup> 1. Joan. n, 1. — <sup>2</sup> Rom. viii, 34. — <sup>3</sup> Joan. x, 16. — <sup>4</sup> Id. xxi, 17. — <sup>5</sup> Cant. i, 7.

« Nisi cognoveris temetipsam, o pulchra inter mulieres,  
 » exi tu. » Quam mala vox : « Exi. A nobis, inquit,  
 » exierunt, sed non erant ex nobis<sup>1</sup>. » Huic tristi voci,  
 quod est : « Exi, » contraria est in bono illa vox gratula-  
 bilis : « Intra in gaudium Domini tui<sup>2</sup>. » Ergo, « Nisi  
 » cognoveris temetipsam, o pulchra inter mulieres, » o  
 catholica pulchra inter haereses : « Nisi cognoveris temet-  
 » ipsam, o pulchra inter mulieres, exi tu : » non enim  
 ego te ejicio, sed « Exi tu. A nobis enim exierunt. Qui  
 » segregant semetipsos, animales, spiritum non haben-  
 » tes<sup>3</sup>. » Non enim dictum est : Ejecti sunt; sed, « Exie-  
 » runt. » Hoc et in primis peccantibus justitia divina  
 servavit. Tanquam enim jam pronus proprio pondere, di-  
 misit eos de paradyso, non exclusit<sup>4</sup>. « Nisi ergo cogno-  
 » veris temetipsam, o pulchra inter mulieres, exi tu : » non  
 ego te ejicio, « Exi tu. » Ego te in corpore meo volo sa-  
 nari, tu putredinem tuam appetis amputari. Hoc illis dic-  
 tum est, qui prævidebantur exituri, ut possint se agnos-  
 cere et cavere mansuri. Quare enim et illi exierunt, nisi  
 quia se non agnoverunt? Si enim agnoscerent, ibi vide-  
 rent non suum, sed Dei esse quod darent. Ego do : meum  
 est quod do; et ideo sanctum est, quia ego do. Non te  
 agnovisti, merito existi. Noluisti enim audire dicentem :  
 « Nisi cognoveris temetipsam, o pulchra inter mulieres. »  
 Pulchra enim aliquando eras, quando sponsi tui membris  
 inhærebas. Noluisti ergo audire et appendere quid sit  
 « Nisi cognoveris temetipsam : » quia utique foedam te  
 invenit, quia de foeda pulchram fecit, quia de nigra deal-  
 bavit. « Quid enim habes quod non accepisti<sup>5</sup>? » Non  
 ergo advertis quemadmodum dictum sit : « Nisi cogno-  
 » veris temetipsam, exi tu. » Et putasti te pascere debere

<sup>1</sup> Joan. n, 19. — <sup>2</sup> Matth. xxv, 21. — <sup>3</sup> Jude. xix. — <sup>4</sup> Gen. iii, 23.  
 — <sup>5</sup> Cor. iv, 7.

oves tuas, non quomodo dictum est Petro : « Pasce oves  
 » meas. » Sed vide quid tibi adjunxit, qui tibi ista prædixit:  
 « Exi tu in vestigiis gregum; » non gregis, sed « gregum. »  
 Nam ibi pascuntur oves Christi, ubi est unus grex et unus  
 pastor. « Exi ergo tu in vestigiis gregum, » divisibilis,  
 divisa, consissa : « Exi tu in vestigiis gregum : et pasce  
 » hoedos tuos; » non sicut Petrus : « Oves meas; » sed,  
 « Hoedos tuos : in tabernaculis pastorum, » non in ta-  
 bernaculo pastoris. Petrus intrat charitate, tu exis ani-  
 mositate : quia Petrus cognovit semetipsum, ideo se flevit  
 de se præsumentem, et invenire meruit adjuvantem : ideo  
 « Exi tu. » Ille « Oves meas, » tu « Hoedos tuos. » Ille  
 in tabernaculo pastoris, tu « In tabernaculis pastorum. »  
 Quid ergo jactas poenam tuam malam, quæ non habes  
 causam bonam?

VII. Martyres itaque intus honoremus in tabernaculo  
 pastoris, in membris pastoris, habentes gratiam, non  
 audaciam; pietatem, non temeritatem; constantiam, non  
 pertinaciam, collectionem, non divisionem. Proinde si  
 vultis Martyres veros imitari, causam vobis eligite, ut  
 dicatis Domino : « Judica me, Domine, et discerne cau-  
 » sam meam a gente non sancta<sup>1</sup>. » Discerne, non pœ-  
 nam meam; nam habet hanc et gens non sancta; sed cau-  
 sam meam, quam non habet nisi gens sancta. Causam  
 ergo vobis eligite, causam bonam et justam tenete, et in  
 adjutorio Domini nullam poenam timete. Conversi ad Do-  
 minum, etc.

<sup>1</sup> Psal. xlii, 1.

SERMO CCLXXXVI<sup>1</sup>.

*In Natali Martyrum Protasii et Gervasii<sup>2</sup>.*

I. MARTYRES, nomen est græcum, sed jam isto nomine consuetudo utitur pro latino: latine autem Testes dicuntur. Sunt ergo Martyres veri, sunt falsi: quia sunt testes veri, sunt falsi. Sed ait Scriptura: « Testis falsus non erit » impunitus<sup>3</sup>. » Si testis falsus non erit sine poena, nec testis verus sine corona. Et facile quidem fuit, Domino Iesu Christo et veritati, quia Deus est, testimonium perhibere; sed usque ad mortem, magnum opus fuit. Fuerunt quidam, quos Evangelium notat, principes Judæorum, qui crediderunt in Dominum Jesum; sed propter Judæos, inquit, non audebant publice confiteri. Et continuo nota addita est capiti; secutus enim ait Evangelista: « Amaverunt enim hominum gloriam magis quam Dei<sup>4</sup>. » Fuerunt ergo qui erubescerent coram hominibus confiteri Christum: fuerunt vero alii jam meliores qui non erubescerent coram hominibus confiteri Christum, sed non eum possent confiteri usque ad mortem. Dona enim Dei sunt haec: et aliquando gradatim in anima nutruntur. Attendite prius, et istos tres testes comparete inter se; unum qui credit in Christum, et vix timide susurrat Christum: aliud qui credit in Christum, et publice confitetur

<sup>1</sup> Alias de Diversis 39. — <sup>2</sup> De his Mediolanensis Martyribus in Carthaginensi Kalendario et in Martyrologiis die 19 Junii. — <sup>3</sup> Prov. xix, 5 et 9. — <sup>4</sup> Joan. xii, 43.

Christum; tertium qui credit in Christum, et paratus est in sua confessione mori pro Christo. Prior ille tam infirmus est, ut pudor eum vincat, non timor: secundus jam habet firmam frontem, sed nondum usque ad sanguinem: tertius totum<sup>1</sup>, ut nihil sit amplius quod restet. Implet enim quod scriptum est: « Certa pro veritate usque ad mortem<sup>2</sup>. »

II. De Petro quid dicimus? Praedicavit Christum, missus est, evangelizavit adhuc ante Domini passionem. Novimus enim missos Apostolos, ut Evangelium prædicarent: missus est, et prædicavit. Quantum vicerat illos Judæos, qui timabant publice confiteri? Sed tamen adhuc non erat similis Protasio et Gervasio. Jam Apostolus erat, primus erat, Domino cohærebat. Dictum illi erat: « Tu es Petrus: » sed nondum erat Protasius aut Gervasius, nondum erat Stephanus, nondum erat Nemesianus<sup>3</sup> puer; nondum hoc erat Petrus: nondum erat quod mulieres quædam, quod puellæ, quod Crispina, quod Agnes; nondum erat Petrus, quod istarum muliebris infirmitas. Laudo Petrum; sed prius erubesco pro Petro. Quam prompta anima! sed nesciens se metiri. Nam utique si prompta non esset, non diceret Salvatori: Moriar pro te. « Et si oportuerit me mori tecum, non te negabo<sup>4</sup>. » Sed medicus qui noverat venam cordis inspicere, prænuntiavit accessionis periculum. « Tu, inquit, pro me animam tuam ponis? » Agnosce ordinem. Ego prior pono. « Tu pro me animam tuam

<sup>1</sup> Subaudi habet, vel implet. — <sup>2</sup> Eccli. ix, 33. — <sup>3</sup> Matth. xvi, 18. — <sup>4</sup> In recentioribus MSS. *Mesianus*. At in antiquissimo Germanensi, ut in editis libris, *Nemesianus*. Martyrem hunc non habet Romanum Martyrologium. In Kalendario Carthaginensi notatur X Kal. Jan. Sancti Nemesiani celebritas, istius forte pueri memoriae dedicata, quem videlicet hic laudat Augustinus quasi Martyrem vulgo notissimum. Alius est Nemesianus ex Africa episcopus in Martyrologiis celebratus IV Idus Septembris. — <sup>5</sup> Matth. xxvi, 35.

» ponis? Amen dico tibi, prius quam gallus cantet, ter  
» me negabis<sup>1.</sup> » Prænuntiavit medicus, quod nesciebat  
ægrotus. Invenit se ergo ægrotus falsum præsumpsisse,  
quando interrogatus est: « Tu de illis es<sup>2?</sup> » Quæ inter-  
rogavit ancilla, febris fuit. Ecce febris accessit, ecce hæ-  
ret: quid dicam? Ecce periclitatur, ecce moritur Petrus.  
Quid est enim aliud mori, quam vitam negare? Negavit  
Christum, negavit vitam, mortuus est. Sed ille qui resus-  
citat mortuos, « Respxit eum Dominus, et flevit amare<sup>3.</sup> »  
Negando periit, flendo surrexit. Et mortuus est prior  
pro illo Dominus, sicut oportebat: et mortuus est postea  
pro Domino Petrus, sicut ordo ipse postulabat: et secuti  
sunt Martyres. Strata est via prius spinosa, et pedibus  
Apostolorum contrita, facta lenior secuturis.

III. Quasi semine sanguinis impleta est Martyribus  
terra, et de illo semine seges surrexit Ecclesiæ. Plus as-  
seruerunt Christum mortui, quam vivi. Hodie asserunt,  
hodie prædicant: tacet lingua, sonant facta. Tenebantur,  
ligabantur, includebantur, producebantur, torquebantur,  
urebantur, lapidabantur, percutiebantur, bestiis subrigeban-  
turbantur. In omnibus suis mortibus quasi viles irrideban-  
turbantur: sed « Pretiosa in conspectu Domini mors sanctorum  
» ejus<sup>2.</sup> » Tunc in conspectu Domini tantum pretiosa,  
modo et in conspectu nostro. Tunc enim quando oppro-  
brium erat esse Christianum, vilis erat mors sanctorum in  
conspectu hominum: detestabantur, execrationi habe-  
bantur: pro maledicto objiciebatur: Sic moriaris, sic  
crucifigaris, sic incendaris. Modo ista maledicta quis  
fidelis non optat?

IV. Celebрамus ergo hodierno die, fratres, memoriam  
in hoc loco positam sanctorum Protasii et Gervasii, Me-

<sup>1</sup> Joan. XIII, 38. — <sup>2</sup> Matth. xxvi, 69. — <sup>3</sup> Luc. xxii, 61. — <sup>4</sup> Psal. cxv, 15.

dolanensium Martyrum. Non eum diem quo hic posita  
est, sed eum diem hodie celebramus, quando inventa est  
pretiosa in conspectu Domini mors sanctorum ejus per  
Ambrosium episcopum, hominem Dei: cujus tunc tantæ  
gloriae Martyrum etiam ego testis fui<sup>1.</sup> Ibi eram, facta  
miracula novi, attestante Deo pretiosis mortibus sancto-  
rum suorum: ut per illa miracula jam non solum in cons-  
pectu Domini, sed etiam in conspectu hominum esset  
mors illa pretiosa. Cæcus notissimus universæ civitati illu-  
minatus est, cucurrit, adduci se fecit, sine duce reversus  
est. Nondum audivimus quod obierit: forte adhuc vivit.  
In ipsa eorum basilica, ubi sunt eorum corpora, totam  
vitam suam servitum se esse devovit. Nos illum gavisi  
sumus videntem, reliquimus servientem.

V. Non cessat Deus attestari: et novit quomodo ipsa  
miracula sua beat commendare. Novit agere, ut magni-  
ficentur: novit agere, ne vilescant. Non omnibus donat  
per Martyres sanitatem; sed omnibus promittit imitatori-  
bus Martyrum immortalitatem. Quod non omnibus dat,  
non querat cui non dat; nec murmuret adversus eum  
quia non dat, ut det quod in fine promisit. Nam et qui  
modo sanantur, post paululum aliquando moriuntur:  
qui in fine resurgunt, cum Christo vivent. Præcessit ca-  
put, expectat membra secutura: implebitur totum cor-  
pus, Christus et Ecclesia. Ibi nos computet scriptos: et  
in hac vita quod expedit det. Novit enim ille quid expe-  
diat filiis suis. « Si ergo vos, inquit, cum sitis mali, nostis  
» bona data dare filiis vestris, quanto magis Pater vester  
» qui in cœlis est, dabit bona potentibus se<sup>2?</sup> » Quæ  
bona? numquid temporalia? Dat et ipsa; sed et infidelib-  
us dat. Dat et ipsa; sed et impiis dat, sed et blasphem-

<sup>1</sup> Vide August. Confess. lib. ix, cap. 7, et de Civit. Dei lib. xxii, cap. 8.

<sup>2</sup> Matth. vii, 11.

matoribus suis dat. Bona quæramus, quæ non nobis sint cum malis communia. Novit ille Pater dare ista bona filiis suis. Modo petit ab illo filius suus sanitatem corporis: et non dat, adhuc flagellat. Sed numquid pater, quando flagellat, non præstat? Profert flagellum, sed cogita quale præparet patrimonium. «Flagellat, inquit, omnem filium quem recipit. Quem enim diligit Dominus, corripit<sup>1.</sup>» Ideo ista dico, fratres mei, ne contristemini quando petitis, et non accipitis, et arbitremini quod ante oculos vos non habeat Deus, si ad tempus non exaudiat voluntatem vestram. Non enim semper ægrum exaudit medicus ad voluntatem, quamvis ejus sine dubio procuret atque appetat sanitatem. Non dat quod petit: sed quod non petit, hoc procurat. Petit frigidam, non dat. Crudelis factus est, qui venit sanare? Artis est, non crudelitatis. Non dat ad horam quod delectat: ut sanus possit omnia, nondum sano negantur aliqua.

VI. Considerate promissiones Dei. Iстis ipsis Martyribus quid, putatis quia omne quod postulaverunt dedit? Non. Multi se optaverunt dimitti, et cum aliquo miraculo dimitti, quomodo dimissi sunt tres pueri de camino. Qualis vox regis Nabuchodonosor? «Quoniam, inquit, speraverunt in eum, et verbum regis immaturaverunt<sup>2.</sup>» Quale testimonium perhibet, qui conabatur occidere? Incendi illos voluit, qui postea per illos credidit. Si illi in igne morerentur, occulte coronarentur, huic non prodesset. Ideo ad tempus servati sunt, ut crederet infidelis, ut laudaret Deum, qui damnaverat illos. Ipse fuit Deus trium puerorum, qui fuit Deus Machabæorum. Illos de igne liberavit, illos in igne mori fecit. Mutatus est? Plus illos quam illos diligebat? Major corona data est Machabæis<sup>3.</sup> Certe illi evaserunt ignes, sed ad pericula istius sæculi

<sup>1</sup> Hebr. xii, 6. — <sup>2</sup> Dan. iii, 95. — <sup>3</sup> 2 Mach. vii.

servati sunt: illi in ignibus omnia pericula finierunt. Non ulterius restabat ulla tentatio, sed sola coronatio. Ergo plus acceperunt Machabæi. Executite fidem vestram, oculos cordis proferte, nolite humanos: habetis enim alios intus, quos vobis Dominus fecit, qui vobis oculos cordis aperuit, quando fidem dedit. Ipsos oculos interrogate: qui plus acceperunt, Machabæi, an tres pueri? Fidem interrogo. Homines sæculi hujus amatores si interrogem: Ego inter tres pueros volebam esse, dicit mihi anima infirma. Erubescet matri Machabæorum, quæ voluit filios suos ante se mori, quia sciebat non mori.

VII. Ego aliquando memoror de libellis miraculorum Martyrum, quæ in conspectu vestro leguntur. Ante dies lectus est quidam libellus, ubi cuidam ægrotæ, quæ doloribus acerrimis torquebatur, cum dixisset: Ferre non possum; ait illi ipse Martyr qui sanare venerat. Quid si martyrium duceres? Multi ergo ducunt martyrium in lecto: prorsus multi. Est quædam persecutio Satanæ, occultior et astutior quam tunc fuit. Jacet fidelis in lecto, torquetur doloribus, orat, non exauditur: imo exauditur, sed probatur, sed exercetur, sed ut recipiatur filius, flagellatur. Ergo cum torquetur doloribus, venit linguæ tentatio, accedit ad lectum aut muliercula aliqua, aut vir, si vir dicendus est; et dicit ægrotō: Fac illam ligaturam, et sanus eris: adhibeat illa præcantatio, et sanus eris. Ille et ille, et ille, interroga, sani inde facti sunt. Non cedit, non obtemperat, non cor inclinat; certat tamen. Vires non habet, et diabolum vincit. Fit martyr in lecto, coronante illo qui pro illo peperdit in ligno.